

Izvještaj visokog predstavnika UN-u



U skladu s mandatom navedenim u Daytonskom mirovnom sporazumu, visoki predstavnik Valentin Inzko podnio je 30. aprila 2013. Izvještaj generalnom sekretaru UN-a Ban Ki-moonu u kojem je izložio situaciju u vezi s provedbom mira u Bosni i Hercegovini te naveo izazove i objasnio strategiju koju je međunarodna zajednica usvojila kao odgovor na ove izazove.

Izvještaj visokog predstavnika obuhvata period od 27. oktobra 2012. godine do 20. aprila 2013. godine. Generalni sekretar je 3. maja Izvještaj dostavio Vijeću sigurnosti. To je 43. izvještaj UN-u koji podnosi visoki predstavnik te deveti izvještaj od kada je Dr. Valentin Inzko preuzeo ovu funkciju 26. marta 2009. godine.

U najnovijem izvještaju visoki predstavnik je konstatirao da su se nastavili međustranački problemi u Federaciji, nedostatak napretka na zakonodavnom polju na državnom nivou kao i, uprkos lakoj promjeni vlade, osporavanja Daytonskog mirovnog sporazuma i suvereniteta BiH od strane političara iz Republike Srpske. Inzko je naveo da su se ovi problemi nastavili u pozadini materijalnih teškoća uzrokovanih ekonomskom krizom kojima se političke stranke nisu uspjele pozabaviti na ozbiljan ili efikasan način.

Visoki predstavnik je naglasio da se ništa ne može postići bez učvršćivanja vladavine prava te citirao da su „brojni slučajevi u kojima politički lideri, stranke i institucije

zaobilaze, ignoriraju ili u nekim slučajevima direktno krše zahtjeve utvrđene ustavima i zakonima radi političke svrsishodnosti.“

Inzko je takođe posvetio pažnju i „osporavanjima državnih institucija osnovanih kao zaštita vladavine prava“ te “neprovođenju odluka Ustavnog suda BiH.“

Visoki predstavnik je konstatirao da OHR i Delegacija Evropske unije i specijalni predstavnik EU, zajedno s ostatkom međunarodne zajednice, i dalje blisko surađuju kako međusobno tako i sa ključnim partnerima iz BiH, u cilju prevazilaženja političkih nedostataka i povratka zemlje na put koji vodi evroatlantskim integracijama i potpunom poslijeratnom oporavku.

Cijeli tekst Izvještaja visokog predstavnika možete pročitati na [sljedećem linku](#).